



XALQ DEPUTATLARI KATTAQO'RG'ON TUMANI KENGASHINING Q A R O R I

2025-yil 20-fevral

VII-6-29-7-96-K/25

Kattaqo'rg'on tumani

Xalq deputatlari tuman Kengashi tomonidan Kengash so'rovini, tuman Kengash deputati tomonidan deputat so'rovini yuborish tartibini tasdiqlash to'g'risida

O'zbekiston Respublikasi Oliy Majlisi Senati Kengashining 2025-yil 28-yanvardagi "Xalq deputatlari viloyat, tuman, shahar Kengashi tomonidan Kengash so'rovini, mahalliy Kengash deputati tomonidan deputat so'rovini yuborish tartibini tasdiqlash to'g'risida"gi KQ-53-V-sonli Qarori hamda "Mahalliy davlat hokimiyati to'g'risida"gi O'zbekiston Respublikasi Qonunining 6- va 24-moddalariga muvofiq, Xalq deputatlari tuman Kengashining yettinchi chaqiriq, oltinchi sessiyasi

QAROR QILADI:

1. O'zbekiston Respublikasi Oliy Majlisi Senati Kengashining 2025-yil 28-yanvardagi KQ-53-V-sonli qarori ma'lumot va ijro uchun qabul qilinsin.
2. Xalq deputatlari tuman Kengashi tomonidan Kengash so'rovini, mahalliy Kengash deputati tomonidan deputat so'rovini yuborish tartibi 1-ilovaga muvofiq tasdiqlansin.
3. Mazkur Qarorning ijrosini nazorat qilish xalq deputatlari tuman Kengashining korrupsiyaga qarshi kurashish va xavfsizlik masalari bo'yicha komissiyasi (R.Djurayev), Kotibiyat mudiri M.Teshayev zimmasiga yuklansin.
4. Ushbu Qaror qabul qilingan kundan e'tiboran kuchga kiradi.

Kengash raisi



NASRIDDINOV
JAMSHID
TULKINOVICH

Xalq deputatlari Kattaqo'rg'on tumani
Kengashining
2025-yil 20-fevraldagi
VII-6-29-7-96-K/25 -son qaroriga
1-ilova

**Xalq deputatlari Kattaqo'rg'on tuman Kengashi tomonidan
Kengash so'rovini, tuman Kengashi deputati tomonidan
deputat so'rovini yuborish
TARTIBI**

1-bob. Umumiy qoidalar

1. Xalq deputatlari Kattaqo'rg'on tuman Kengashi (bundan buyon matnda tuman Kengashi deb yuritiladi) tomonidan Kengash so'rovini, tuman Kengashi deputati tomonidan deputat so'rovini yuborish tartibi (bundan buyon matnda Tartib deb yuritiladi) tuman Kengashi doimiy komissiyalari, deputatlari va tuman Kengashi kotibiyatlari tomonidan Kengash so'rovi hamda deputat so'rovini tayyorlash tartibi va uning mazmuni hamda tuzilishiga doir talablar, shuningdek, ularni yuborish tartibini belgilaydi.

2. Tartib "Mahalliy davlat hokimiyati to'g'risida"gi, "Xalq deputatlari viloyat, tuman Kengashi deputatining maqomi to'g'risida"gi O'zbekiston Respublikasi qonunlari hamda boshqa qonun hujjatlariga muvofiq ishlab chiqilgan.

3. Xalq deputatlari tuman Kengashi hamda deputati so'rovi tegishincha davlat organlari hamda tashkilotlarining tuman bo'linmalari mansabdor shaxslariga yuboriladi.

4. Kengash so'rovi va deputat so'rovi tezkor-qidiruv faoliyatini amalga oshiruvchi organlarning, surishtiruv hamda tergov organlarining, sudlarning ish yurituvidagi muayyan ishlar va materiallarga, shuningdek, ijro ishi yuritish hamda notarial ish yuritishning muayyan materiallarini ko'rib chiqish bilan bog'liq faoliyatga taalluqli bo'lishi mumkin emas.

2-bob. Kengash so'rovi

5. Kengash so'rovi Tartibning 3-bandiga muvofiq davlat organlari va tashkilotlarining mansabdor shaxslariga qonunlarning, hududlarni ijtimoiy-iqtisodiy rivojlantirish dasturlarining ijrosi masalalari hamda ularning vakolatlariga kiradigan boshqa muhim masalalar yuzasidan asoslantirilgan tushuntirish berish yoki nuqtai nazarini bayon etish talabi qo'yilgan tuman Kengashi murojaat qilishining alohida shaklidir.

6. Tuman Kengashi doimiy va muvaqqat komissiyalari, partiya guruhlari, deputatlar o'z tashabbusi bilan yoki tuman Kengashi raisining topshirig'iga

muvofiq tuman Kengashi tomonidan Kengash so'rovi yuborilishi haqida taklif ishlab chiqishi mumkin.

7. Kengash so'rovi loyihasini tayyorlash quyidagi bosqichlarni o'z ichiga qamrab oladi:

Kengash so'rovining predmeti va maqsadini aniqlash;

Kengash so'rovining predmeti doirasida avval tuman Kengashi yoki uning doimiy va muvaqqat komissiyalari tomonidan o'rganish o'tkazilganlik holatini aniqlash, o'rganish o'tkazilgan taqdirda uning natijalarini tahlil qilish;

Kengash so'rovi tayyorlash uchun zarur bo'lgan materiallarni (tegishli sohani tartibga soluvchi normativ-huquqiy hujjatlar, xorijiy mamlakatlar tajribasi, huquqni qo'llash amaliyotida vujudga kelgan muammolar, davlat organlari va tashkilotlari, nodavlat notijorat tashkilotlaridan kelib tushgan ma'lumotlar, jismoniy hamda yuridik shaxslarning murojaatlari, ommaviy axborot vositalari, Internet jahon axborot tarmog'ida e'lon qilingan materiallar va boshqalar) yig'ish;

mavjud materiallar asosida xulosa shakllantirish va Kengash so'rovi loyihasini tayyorlash;

Kengash so'rovi loyihasini huquqiy va boshqa zarur ekspertizalardan o'tkazish.

8. Zarur hollarda Kengash so'rovi loyihasini tayyorlash maqsadida ishchi guruh tuzilishi, huquqni qo'llash amaliyotida vujudga kelgan muammolar bevosita tegishli davlat organlarida yoki hududlarga chiqib o'rganilishi mumkin.

Ishchi guruh tarkibiga hududdan saylangan senatorlar, tuman Kengashi deputatlari, tuman Kengashi kotibiyati xodimlari, tegishli sohalar uchun mas'ul bo'lgan vazirliklarning, davlat qo'mitalarining yoki idoralarning hududiy bo'linmalari, boshqa manfaatdor davlat organlarining, ilmiy va boshqa tashkilotlarning vakillari, shuningdek, faol fuqarolik pozitsiyasiga ega fuqarolar kiritilishi mumkin. Bunda nodavlat tashkilotlari vakillari hamda fuqarolar o'z roziligi bilan ishchi guruh tarkibiga kiritiladi.

9. Kengash so'rovi loyihasining matni quyidagi tarkibiy qismlardan iborat bo'ladi:

kirish qismi (Kengash so'rovining predmeti va maqsadi, tegishli sohada amalga oshirilgan ishlarning qisqacha mazmuni);

asoslantiruvchi qism (huquqni qo'llash amaliyotida vujudga kelgan muammolar);

yakunlovchi qism (qonunlarning, hududlarni ijtimoiy-iqtisodiy rivojlantirish dasturlarining ijrosi masalalari, asoslantiruvchi qismda ko'rsatilgan muammolar yechimi hamda ularning vakolatlariga kiradigan boshqa muhim masalalar yuzasidan asoslantirilgan tushuntirish berish yoki nuqtai nazarini bayon etish talabi, javob taqdim etish shakli va muddati).

10. Kengash so'rovi loyihasi matni quyidagilar tahlili asosida shakllantiriladi:

Kengash so'rovi predmetiga taalluqli normativ-huquqiy va boshqa hujjatlar;

qonunchilikka muvofiq tuman Kengashi, uning doimiy va muvaqqat komissiyalari hamda tuman Kengashi deputatlari tomonidan o'tkazilgan nazorat-tahlil tadbirlari materiallari (mahalliy budjet ijrosining borishini ko'rib chiqish, mansabdor shaxslarning hisobot hamda axborotlarini eshitish, qonun hujjatlarining ijrosi holatini, huquqni qo'llash amaliyotini o'rganish, Kengash tekshiruvi va boshqalar);

tegishli soha huquqni qo'llash amaliyoti bo'yicha ilmiy seminar, konferensiya, davra suhbatlari va boshqa tadbirlar materiallari;

davlat organlari hamda boshqa manfaatdor idoralarning ma'lumotlari;

ommaviy axborot vositalarida, Internet jahon axborot tarmog'ida e'lon qilingan materiallar;

huquqni qo'llash amaliyoti va aholini tashvishga solayotgan muammolar bo'yicha o'tkazilgan sotsiologik so'rovlar natijalari;

jismoniy va yuridik shaxslarning murojaatlari, shu jumladan tuman Kengashining veb-saytiga hamda ijtimoiy tarmoqlardagi sahifalariga kelib tushgan murojaatlar;

xorijiy mamlakatlarda Kengash so'rovi predmetida nazarda tutilayotgan muammolarni bartaraf qilish bo'yicha amalga oshirilgan tajriba;

statistik va boshqa ma'lumotlar.

11. Kengash so'rovi loyihasining matni bayon etishning tizimlilik va ketma-ketligiga muvofiq bo'lib, lo'nda, oddiy hamda ravon tilda shakllantiriladi.

Kengash so'rovi loyihasi matnidagi jumlar rasmiy til uslubidan va yuridik atamalardan foydalanilgan holda, umumiy qabul qilingan grammatika, imlo hamda punktuatsiya qoidalariga muvofiq tuziladi.

12. Kengash so'rovi loyihasida og'zaki nutq shakllari, davlat tilida teng ma'noli so'zlar va tushunchalar mavjud bo'lgan taqdirda, chet tillari atamalari, eskirgan hamda ko'p ma'noni anglatadigan so'zlar hamda iboralar, majoziy taqqoslashlar, sifatlashlar, kinoyalar, abbreviatura va qisqartmalar (bundan umumiy qabul qilingan abbreviatura, qisqartmalar, shuningdek, qonunosti hujjatlarining ilovalaridagi tashkilotlarning qisqartirilgan nomlari mustasno) qo'llanilishiga yo'l qo'yilmaydi.

13. Kengash so'rovi loyihasida amaldagi normativ-huquqiy hujjatlarga, O'zbekiston Respublikasi Prezidenti tomonidan rasmiy chiqishlarda va tegishli majlislarda belgilangan ustuvor vazifalar hamda topshiriqlarga havolalar kiritilishiga yo'l qo'yiladi.

Bunda havolalar aniq bo'lishi va tegishincha muayyan normativ-huquqiy hujjat yoki uning alohida qoidalari, O'zbekiston Respublikasi Prezidentining rasmiy chiqishi hamda tegishli majlislari aniq ko'rsatilishi kerak.

14. Kengash so'rovi loyihasida so'rovga javob berishning shakli (og'zaki yoki yozma) to'g'risidagi talablar bo'lishi kerak.

15. Kengash so'rovi loyihasi belgilangan tartibda tayyorlangandan so'ng u dastlabki tarzda doimiy yoki muvaqqat komissiya majlisida ko'rib chiqiladi.

16. Doimiy yoki muvaqqat komissiya Kengash so'rovi loyihasi tayyorlanishi uchun mas'ul bo'lgan deputatning axborotini eshitib, tuman Kengashi tomonidan Kengash so'rovi yuborish masalasini tuman Kengashining navbatdagi sessiyasi kun tartibi loyihasiga kiritish yoki kiritmaslik bo'yicha tuman Kengashi raisiga taklif kiritish haqida qaror qabul qiladi.

17. Tuman Kengashi raisi tomonidan Kengash so'rovi yuborish masalasini tuman Kengashining navbatdagi sessiyasi kun tartibiga kiritish haqida qaror qabul qilingan taqdirda, doimiy yoki muvaqqat komissiya:

tuman Kengashi sessiyasida Kengash so'rovi bo'yicha so'zga chiqadigan ma'ruzachini;

tuman Kengashi qarori loyihasi va boshqa zarur materiallar tayyorlanishi uchun mas'ul deputatni belgilaydi.

18. Shundan so'ng tuman Kengashi doimiy va muvaqqat komissiyalari, partiya guruhlarining tuman Kengashi tomonidan Kengash so'rovi yuborish haqidagi taklifi tuman Kengashi raisi tomonidan tuman Kengashining navbatdagi sessiyasi kun tartibi loyihasiga kiritiladi.

19. Kengash so'rovini yuborish masalasi tuman Kengashi sessiyasida muhokama qilinganda tuman Kengashi sessiyasi ochiq, oshkora o'tkaziladi va ommaviy axborot vositalari tomonidan yoritilishi mumkin.

Zarurat bo'lganda tuman Kengashi yopiq majlis o'tkazish haqida qaror qabul qilishi mumkin.

20. Kengash so'rovi yuborish masalasi ko'rib chiqilganda tuman Kengashi va uning doimiy hamda muvaqqat komissiyalari majlislarida davlat organlari hamda tashkilotlari, nodavlat notijorat tashkilotlarining, ilmiy muassasalarning vakillari, mutaxassislar va olimlar, matbuot organlarining, televideniye, radio hamda boshqa ommaviy axborot vositalarining vakillari taklif qilinishi mumkin.

21. Sessiyada raislik qiluvchi tomonidan Kengash so'rovi yuborish to'g'risidagi masala ko'rib chiqilayotganda ma'ruzachilar va qo'shimcha ma'ruzachilar bilan kelishuvga ko'ra, qoida tariqasida, ma'ruza uchun – 30 daqiqagacha, qo'shimcha ma'ruza uchun – 20 daqiqagacha hamda yakunlovchi so'z uchun 15 daqiqagacha vaqt belgilanadi.

Muzokaralarda so'zga chiquvchi deputatlarga 10 daqiqagacha vaqt beriladi. Muzokaralarda takroran so'zga chiqish uchun, shuningdek, savollar, takliflar, xabarlar, ma'lumotlar uchun 3 daqiqagacha vaqt beriladi.

Sessiyada hozir bo'lgan deputatlar ko'pchiligining roziligi bilan raislik qiluvchi Kengash so'rovi yuborish to'g'risidagi masalani muhokama qilishning umumiy vaqtini, savollar va javoblar uchun ajratiladigan vaqtni belgilab qo'yishi, so'zlash vaqtini uzaytirishi mumkin.

Deputat Kengash so'rovi yuborish to'g'risidagi masala bo'yicha muzokaralarda ko'pi bilan ikki marta so'zga chiqishi mumkin.

Muzokaralarni to'xtatish to'g'risida qaror qabul qilingandan keyin ma'ruzachi va qo'shimcha ma'ruzachi yakunlovchi so'zni aytish huquqiga ega.

Agar soʻzga chiquvchi ajratilgan vaqtdan ortiq soʻzlasa yoki muhokama etilayotgan masala yuzasidan fikr bildirmayotgan boʻlsa, sessiyada raislik qiluvchi uni avval ogohlantirib, keyin soʻzdan mahrum qiladi.

22. Kengash soʻrovini yuborish haqidagi tuman Kengashi qarori tuman Kengashi deputatlarining umumiy sonining koʻpchilik ovozi bilan qabul qilinadi.

23. Kengash soʻrovini yuborish haqidagi tuman Kengashi qarori qabul qilingan kundan boshlab oʻn kalendar kun ichida Kengash soʻrovi tegishli boʻlgan mansabdor shaxsga “E-kengash” mahalliy hokimiyat vakillik organlari portali orqali yuboriladi. Kengash soʻrovi yuborish haqidagi tuman Kengashi qaroriga Kengash soʻrovining matni va boshqa asoslantiruvchi materiallar ilova qilinadi.

24. Kengash soʻrovi yuborilgan mansabdor shaxs Kengash soʻroviga yozma javobni, agar boshqa muddat belgilanmagan boʻlsa, soʻrov olingan kundan eʼtiboran oʻn kalendar kundan kechiktirmay yuborishi lozim.

Kengash soʻroviga javobda soʻrovda qoʻyilgan masalalarning har biri boʻyicha aniq va batafsil asoslantirilgan maʼlumotlar ochib berilishi kerak.

Kengash soʻroviga javob oʻz nomiga soʻrov yuborilgan mansabdor shaxs yoki uning vazifalarini vaqtincha bajarayotgan shaxs tomonidan imzolanadi.

25. Kengash soʻrovi yuzasidan kelib tushgan yozma javob tuman Kengashi kotibiyati tomonidan tanishib chiqish va u yuzasidan masʼul doimiy yoki muvaqqat komissiyani belgilash uchun tuman Kengashi raisiga taqdim etiladi.

26. Kengash soʻroviga kelib tushgan javobni koʻrib chiqishga masʼul etib belgilangan doimiy yoki muvaqqat komissiya yozma javobda koʻrsatilgan maʼlumotlar asosliligini tekshiradi va u yuzasidan zarur materiallar tayyorlaydi.

27. Kengash soʻroviga javob bergan mansabdor shaxs tomonidan Kengash soʻrovi ijro etilishi natijalari doimiy yoki muvaqqat komissiyaning navbatdagi majlisida koʻrib chiqiladi. Ushbu koʻrib chiqish natijalari boʻyicha doimiy yoki muvaqqat komissiya qaror qabul qiladi.

28. Agar Kengash soʻroviga yozma javobdagi axborot belgilangan masalalar yuzasidan toʻliq javobni qamrab olmagan, qayd etilgan sohalarda muammolarni bartaraf etish boʻyicha zarur choralar koʻrilmagan yoki nazarda tutilmagan boʻlsa, masʼul doimiy yoki muvaqqat komissiya Kengash soʻroviga javobni Kengash soʻrovi yuborilgan mansabdor shaxsga u yuzasidan mulohazalar va takliflarni koʻrsatgan holda ushbu mansabdor shaxsga maromiga yetkazish uchun qaytarib yuborishi mumkin.

29. Kengash soʻroviga javob Kengash soʻrovi yuborilgan mansabdor shaxsga doimiy yoki muvaqqat komissiya tomonidan qaytarib yuborish toʻgʻrisida qaror qabul qilingan taqdirda, unda qayta javob berishning muddati koʻrsatiladi.

Qaytarib yuborilgan Kengash soʻroviga javob kelib tushganda u umumiy tartibda koʻrib chiqiladi.

Bunda, agar kelib tushgan javobdagi axborot belgilangan masalalar yuzasidan to'liq javobni qamrab olmagan, qayd etilgan sohalarda muammolarni bartaraf etish bo'yicha zarur choralar ko'rilmagan yoki nazarda tutilmagan bo'lsa, mazkur masala tuman Kengashining navbatdagi sessiyasida ko'rib chiqiladi.

30. Kengash so'roviga yozma javob tuman Kengashining sessiyasida ko'rib chiqilganda u sessiyada raislik qiluvchi tomonidan o'qib eshittiriladi. Yozma javobning nusxalari tuman Kengashi sessiyasida o'qib eshittirilguniga qadar oldindan tuman Kengashi deputatlariga yuboriladi.

31. Kengash so'rovi o'z nomiga so'rov yuborilgan mansabdor shaxs Kengash so'roviga og'zaki javobni tuman Kengashining sessiyasida tuman Kengashi tomonidan belgilagan muddatda beradi.

32. Mansabdor shaxsning Kengash so'roviga javobini eshitish natijalari bo'yicha tuman Kengashi tomonidan qaror qabul qilinadi. Tuman Kengashi qarori qabul qilingan kundan boshlab o'n kun ichida tegishli mansabdor shaxsga yuboriladi.

33. Agar tuman Kengashi qarorida Kengash so'roviga javob bergan mansabdor shaxsga tavsiyalar yoki topshiriq bo'lsa, tuman Kengashining ushbu qarorida bayon etilgan tavsiyalar yoki topshiriqlarning ijrosini nazorat qilish uchun mas'ul bo'lgan doimiy yoxud muvaqqat komissiya ham ko'rsatiladi.

3-bob. Deputat so'rovi

34. Deputat so'rovi Tartibning 3-bandiga muvofiq tegishli hududda joylashgan davlat hokimiyati va boshqaruvi organlarining mansabdor shaxslariga ularning vakolatlariga kiradigan masalalar yuzasidan asoslantirilgan tushuntirish berish yoki o'z nuqtai nazarini bayon qilish talabi qo'yilgan deputat murojaat qilishining alohida shaklidir.

35. Deputat so'rovi davlat hokimiyati va boshqaruvi organlarining mansabdor shaxslariga, qoida tariqasida, tegishli saylov okrugi saylovchilarining huquqlari hamda qonuniy manfaatlarini ta'minlash bilan bog'liq masalalar yuzasidan yuboriladi.

36. Deputat so'rovi tuman Kengashi deputatining shaxsiy tashabbusi asosida amalga oshiriladi.

37. Deputat so'rovi "E-kengash" mahalliy hokimiyat vakillik organlari portalidagi "deputat so'rovi" blankasida rasmiylashtiriladi va so'rov muallifi tomonidan imzolanadi.

38. Deputat so'rovida quyidagilar bo'lishi kerak:

Deputat so'rovi yuboriladigan mansabdor shaxsning familiyasi, ismi, otasining ismi hamda uning lavozimi;

deputat so'rovining sabablarini qisqacha asosi;

asoslantirilgan tushuntirish berish yoki nuqtai nazarini bayon etish talabi, javob taqdim etish shakli va muddati.

39. Deputat so'rovi qisqa va tushunarli shaklda bayon etilishi kerak.

40. Deputat so'rovini mansabdor shaxslardan muayyan harakatni amalga oshirish yoki amalga oshirmaslik bo'yicha ruxsat olish tarzida yuborish mumkin emas.

41. Deputat so'rovi yuborilishidan avval u tuman Kengashi kotibiyati tomonidan ro'yxatga olinadi.

Deputat so'rovi mansabdor shaxslarga "E-kengash" mahalliy hokimiyat vakillik organlari portali orqali yuboriladi.

42. Deputat so'rovi yuborilgan mansabdor shaxs unga yozma ravishda, agar boshqa muddat belgilanmagan bo'lsa, so'rov olingan kundan e'tiboran o'n kundan kechiktirmay yuboradi.

43. Deputat so'roviga javobni u qaysi mansabdor shaxsga yuborilgan bo'lsa, o'sha mansabdor shaxs yoki uning vazifasini bajaruvchi shaxs imzolashi kerak.

Deputat so'roviga javob ushbu so'rovni yuborgan deputatning tuman Kengashiiga yuboriladi.

Deputat so'rovi kelib tushgan javob tuman Kengashi kotibiyatida ro'yxatga olinadi hamda u kotibiyat tomonidan so'rovni imzolagan deputatga yetkaziladi.

44. Tuman Kengashi deputati o'zi a'zo bo'lgan tuman Kengashining tegishli doimiy komissiyasini deputat so'rovini yuborganligi haqida so'rov yuborilgan kun xabardor qiladi.

45. Deputat so'roviga javob tuman Kengashining tegishli doimiy komissiyasining navbatdagi majlisida ko'rib chiqilishi mumkin.

46. Agar deputat so'roviga javob tuman Kengashi doimiy komissiyasining majlisida ko'rib chiqilgan bo'lsa, uni ko'rib chiqish natijalari yuzasidan doimiy komissiya qaror qabul qiladi. Tuman Kengashi doimiy komissiyaning qarori deputat so'roviga javob bergan mansabdor shaxsga yuboriladi.

47. Agar deputat so'roviga javob so'rovda ko'rsatilgan muddatni buzgan holda kelgan bo'lsa yoki agar javobda mavjud bo'lgan axborot deputat so'rovida ko'tarilgan hamma masalalarni hal qilmasa, so'rov yuborgan deputat a'zo bo'lgan tuman Kengashining doimiy komissiyasi tuman Kengashi raisiga deputat so'rovi yuzasidan axborotni tuman Kengashining sessiyasi muhokamasiga olib chiqish haqida taklif kiritishi mumkin.

48. Tuman Kengashi raisi tuman Kengashi doimiy komissiyasi vakilining, agar ishtirok etgan bo'lsa, deputat so'roviga javob bergan mansabdor shaxsning axborotini eshitib, muhokama natijalari bo'yicha deputat so'rovi to'g'risidagi axborotni tuman Kengashining navbatdagi sessiyasi kun tartibi loyihasiga kiritish yoki kiritmaslik masalasini hal qiladi.

49. Agar deputat so'rovi yuzasidan kelib tushgan javobni tuman Kengashining navbatdagi sessiyasi kun tartibiga kiritish haqida qaror qabul qilingan bo'lsa, mazkur masala Tartibda belgilangan qoidalarni inobatga olgan holda ko'rib chiqiladi.

Bunda tuman Kengashi deputatlariga deputat so'rovi, unga kelib tushgan javob, tuman Kengashi doimiy komissiyasining qarori, tuman

Kengashi qarorining loyihasi va boshqa zarur materiallar oldindan taqdim etiladi.

50. Deputat so'rovi haqidagi axborot ko'rib chiqilganida tuman Kengashi sessiyasiga deputat so'roviga javob bergan mansabdor shaxs taklif qilinadi. Ushbu mansabdor shaxs o'z vakolatlariga kiradigan masalalar yuzasidan asoslantirilgan tushuntirish berishi yoki nuqtai nazarini bayon qilishi shart.

4-bob. Yakunlovchi qoidalar

51. Tuman Kengashi o'z vakolatlari doirasida Kengash so'rovi, shuningdek, agar deputat so'roviga doir masala tuman Kengashining sessiyasida ko'rib chiqilgan bo'lsa, deputat so'rovi natijalari bo'yicha:

Kengash so'rovi, deputat so'rovi yuborilgan mansabdor shaxslarni tegishli javobgarlikka tortish, ularni lavozimidan ozod etish to'g'risida tegishli davlat organlariga, Vazirlar Mahkamasi yoki Oliy Majlis Senatiga taklif va tavsiyalar kiritishi;

tegishli davlat organlariga hamda tashkilotlariga qonunchilik hujjatlarining, davlat dasturlarining ijrosi, o'z zimmalariga yuklatilgan vazifalar hamda funksiyalarning amalga oshirilishi samaradorligini oshirishga qaratilgan chora-tadbirlar ko'rish yuzasidan taklif va tavsiyalar kiritishi;

Kengash so'rovi hamda deputat so'rovi bo'yicha tayyorlangan materiallarni vakolatli davlat organlariga o'z vakolatlariga muvofiq ko'rib chiqish uchun yuborishi;

fuqarolarning huquqlari va qonun bilan qo'riqlanadigan manfaatlarini buzish hollari yoki qonun hujjatlarini buzishning boshqa hollari ma'lum bo'lib qolgan taqdirda ularga darhol chek qo'yish choralari ko'rish talabi bilan tegishli davlat organlariga hamda tashkilotlariga hamda mansabdor shaxslarga murojaat qilishi;

Kengash so'rovi va deputat so'rovi natijalarini e'lon qilishi (tuman Kengashining Internet jahon axborot tarmog'idagi, ijtimoiy tarmoqlardagi rasmiy sahifalari, ommaviy axborot vositalari) mumkin.

52. Kengash so'rovi loyihasini tayyorlagan tuman Kengashi deputati va tuman Kengashi kotibiyati mas'ul xodimi Kengash so'roviga doir materiallar qonunchilikka muvofiqligi, unda ko'rsatilayotgan ma'lumotlar asosiligi uchun shaxsan javobgar hisoblanadi.

53. Tartib buzilishida aybdor bo'lgan shaxslarga nisbatan belgilangan tartibda intizomiy yoki boshqa javobgarlik choralari qo'llanilishi mumkin.

54. Tartibga o'zgartish va qo'shimchalar kiritish, uni o'z kuchini yo'qotgan deb topish Senat Kengashi qarori asosida amalga oshiriladi.